



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Nepal tzumetsung nung asur 900 alemogo; nisung 4,247 kong aliar mejangjar

US Open: Djokovic mezunghuba round nung tsukogo



VOL. XXIII ISSUE NO. 320 (ADOK 320) DIMAPUR SANGTENNÜ (TUESDAY) RONGJUI (SEPTEMBER) 01, 2026 ₹ 5.00

Tanü nungi 14 buba NLA monsoon session tenzüker

Kohima, August 31, 2026 (TYO): September 1, 2026 nungi 14 buba Nagaland Legislative Assembly indang tugububa session tenzüksü.

14 buba NLA Monsoon Session nung session alitsü aser Frontier Nagaland Territorial Authority (FNTA) Bill aser Foreign Contribution

(Regulation) Act (FCRA) onüktem benoka lemsateptsü.

Tesüiba nung ama iba session nunga question hour den Matters of Urgent Public Importance, CAG reports, Annual Administrative Reports aser Assembly Committee Reports lemsateptsü.

Rajya Sainik Board, Nagaland senden amen

Dimapur, August 31, 2026 (TYO): August 31, 2026 nü Lok Bhavan, Kohima nung Rajya Sainik Board (RSB), Nagaland indang 24 buba Annual General Meeting menogo.

Iba senden nung Nagaland nung Ex-Servicemen, Veer Naris, amitsürtem aser kinungertem asoshi welfare, rehabilitation aser resettlement indang onüktem benoka lemsatep.

Senden nung Nagaland Governor Nand Kishore Yadav, Chief Minister Dr. Neiphiu Rio, Nagaland sorkar, Armed Forces, Kendriya Sainik Board aser Rajya Sainik Board nungi ketdangsürtem aden.

Ex-Servicemen aser parnok kibongtem nungdak peritsütsü atema Rajya Sainik Board indang Corpus Fund akangshitsü atema senden nung kanga tongti süa jembiogo. Maneni, state sorkar nung Ex-Servicemen anioktsüba aser State Government departments ajak nung reservation provision alitsü indangjembia liasü.

Senden nunga World War-II Veterans yaritsü indangjembi aser idangji tang financial assistance agütsüba den Defence Services nung Gallantry Awardees nem tajangzük agütsüba repringshitsü jembitap.

Mon aser Tuensang district tem nung Zila Sainik Boards/Zila Sainik Welfare Offices

lapoktsüba aser Rajya Sainik Board o Zila Sainik Welfare Offices nung nübo peria shimoktsü indang onüktem lemsatep.

Nagaland Governor aser Rajya Sainik Board President Nand Kishore Yadav-i ex-servicemen aser parnok kibongtem yaritsüba maparen akangshitsü ayongzük.

Linük tenzükertem yaritsüba ya linük tenangzükba lir. Rajya Sainik Board ajanga Armed Forces, sorkar aser veteran nung sendakteper, anungji parnok nem mapang shitak nung healthcare, education, employment aser financial assistance agütsütsüla ta Yadav-i ashi.

Paisa Veer Naris, Veer Matas aser taküm bendanga agütsüba sepai kibongtem nem temulung agüja yaritsü ayongzük.

Chief Minister Neiphiu Rio-ia o jembidang ex-servicemen nung resettlement aser rehabilitation nungdakba nenshi.

Linük nung 'active and fighting-fit force' ayutsü mechi sepaitem lanur asüadang mapanungi sodi angur. Parnok kibong tebilemsütem lia aser kibong junga mesemteta mayudang mapanungi anisüngzüker, anungji parnok kibongtem asoshi employment, healthcare, pensions, aser education atema temulung agütsütsüla ta Rio-i ashi.

NSF-i CM Rio dangi Vande Mataram anema lemtet agitsü ayonger

Dimapur, August 31, 2026 (TYO): Nagaland sorkar sentongtem aser official functions nung Vande Mataram atentsü anema lemtet agiang ta Naga Students' Federation (NSF)-i Chief Minister, Neiphiu Rio ayongzükogo.

Naga nungeri National Flag, National Anthem aser tanga recognised national symbols akhümtsübuttsüba nung ashishitep kecha mali saka kechi südir süaka Vande Mataram atentsü ta asüba atema tebilemtsü abener. Iba ken ya non-Hindu nung mulungsentsü, tamangba yimsü aser inyakyim den meputeper ta NSF-i CM Rio dangi shidi ka zülüogo.

India ya secular democratic republic ka lir aser iba asoshi linük longjemtsü aser meimtsü nungdaker, aser iba ya tamangba yimsü nüjiso, kija mulungsentsü aser senso shia akümtsübuttsüla ta NSF-i ashi.

"Nisung shinga pa mesüra la tamangba yimsü den

meputeptsüsa shilem kecha magidaktsütsüla" ta parnokisa ashi.

Nagaland nung nisung temeyoktep putepa alir aser tamangba yimsü balala kati ka akhümtsübutteper. Anungji tamangba yimsü mesüra lokti ozüngtem ajanga masü iba tangatetba ya wazüka ayutsüla aser akangshitsüla ta NSF-isa metetdaksü.

Ministry of Home Affairs-i January 28, 2026 nü sangdong agütsüba nung Vande Mataram atemba, atenba aser nungtugu kumdaktsütsü indang shia liasü aser iba atema Naga nunger aikati tebilemtsü aben. Naga kaketshirtemi official programmes kar nung shilem magii iba tetuyuba anema noktakba sayuogo aser talisa Nagaland University aser Independence Day 2026 benjungmung nung iba ya sayuogo ta NSF-isa ashi.

India Constitution nung Arla 371A ajanga Nagaland kumzüka

ayur aser iba nung Naga nunger tamangba yimsü mesüra lokti inyaksangshi dena lir. Anungji Nagaland nung alirtem tamangba yimsü inyakyim, tebilemba aser mulungsentsü anema policy mesüra tetuyubatem Arla 371A den medemdanga asadangtsü nungdaker ta NSF-isa CM Rio dang shiogo.

Nagaland Legislative Assembly nung Select Committee kati Vande Mataram onük asadangdar anungji parnoki tekaratiba nung iba osang ya assembly nem agütsütsüla ta NSF-isa ashi.

"Iba Committee-i report agütsür ali nungbo memenui assembly nung benoka lemsateptsü ayongzüker" ta parnokisa CM Rio dang shiogo.

Nagaland Legislative Assembly session alidang iba onük ya benoka lemsateptsüla aser Nagaland nung Vande Mataram 'compulsory participation' anema bangzüng ka renemtsüla ta parnokisa ayongzükogo.

Centre-i Manipur nung Census thinentsü lemtetogo

Imphal, August 31, 2026 (Agencies): New Delhi nung senden ka amenba sülen Centre sorkari Manipur nung Census exercise maparen thinentsü atatsü lemtetogo.

Manipur nung National Register of Citizens (NRC) mezüng update asüba sülen ang Census maparen inyakang ta civil society groups-i takhangba agüja arur.

Ministry of Home Affairs nung Union Home Minister Amit Shah menden ser senden amendang Manipur tensa meyipa repringshi aser Census thinentsü onük benoka lemsatep.

Iba senden nung Manipur

Governor Ajay Kumar Bhalla, Chief Minister Yumnam Khemchand Singh, Union Home Secretary Govind Mohan aser tanga tongti ketdangsürtem aden.

Centre-i Manipur nung nübortem tebilemtsü aser taginübatem agizüka Census thinenogo ta Manipur Chief Minister Secretariat-i metetdaksüogo.

CM Khemchand-i Centre telemtetba pelashishia agizükba metetdaksü aser Prime Minister Narendra Modi o Amit Shah nati tebilemtsü angatetba atema pelaba shiogo.

BJP president Nitin Nabin, civil society organisations 14 aser

BJP MLA teshimtet telok kati New Delhi nung central lennirtem aser ketdangsürtem den ajurutepa sensaksemba atema pelar ta CM Khemchand-isa metetdaksü.

Chief Minister-isa civil society organizations dang mokdang ayonga magitsü mepishiogo. Ibala sentong ajanga public nem timtem bentsür arur ta pai ashi.

Manipur nung tebilemsütem koktettsü atema sorkar den maneni olemtep alitsüla. Ketdangsürtem den asüngdangtepa onüktem lemsateptsüla ta Khemchand-isa ashi.

Mon Police-i auyaba gari 30 tema bushitetogo; kümdangtsü metetdaksür

Dimapur, August 31, 2026 (TYO): Mon Police nung Anti-Vehicle Theft Squad (AVTS) ajanga bushisüngdanga arudang auyaba garitem aser talisa two-wheelers aika ngutetogo.

AVTS-i Mon jila nung mita aodang gari 50 tema ownership records aser kulikakettem shitak maliba puteta liasü.

Bushitepa aodang gari 30 tema Assam kübok Jorhat, Tinsukia, Charaideo aser Sivasagar district tem aser ano Arunachal Pradesh nungia tesem kar nungi samaba garitem liasü ta Mon Police-i ashi.

AVTS-i kidanger State tem nung bangdak police stations den osang agitep aser jangjashitsü atema temulung melemi bilemba garitem indang details lemsatep. Parnok tsüngda ownership



records, FIR aser tanga documentary evidence lemsatepba sülen Mon-i jaoka ozüngi melaba ama maparen inyaka liasü.

Mon nung AVTS-i ngutetba garitem kiburtem mesüra bangdak police ketdangpur ket nung agütsüogo.

Item auyaba ken o aika ya police-i bushitepa aruaka küm pezü nungi pungu tashi meputeti aruba liasü. Ajisüaka Mon Police-i jungjunga bushisüngdanga

aruba ajanga auyaba gari aika ngutetogo.

Iba ajanga Assam nung auyaba garitem Nagaland-i bener arua jenjang dalang agi ayokba inyakyim putetogo. Talisa item garitem ya yimdaklirtem aser tamajung kecha mebilemba nisungtemi alizüka amshir.

Auyaba garitemji jenjang dalang agi 'second-hand vehicles' ta ser ayoker aser talir kar nemo identity documents shitak magütsü ta Mon Police-i

metetdaksüogo.

AVTS-i bushitepa arudang Nagaland nung nisung kari tiyongtsü nung inyaker ama ajiteter aser parnoki auyaba garitem yokdoker aser iba atema commissions angur.

Mon Police-i Assam nung gari auyartem ta temulung melemi bilemertem indang osang Assam nung police ketdangpurtem den lemsatepogo aser maneni auyaba garitem belena ayokertem maitsü jangjatsü bushisüngdang südar.

Mon Police-isa second-hand motorcycles aser garitem alirtem dang kanga kümdangtsü shiogo.

Jenjang dalang agi ayokba nung merangloki gari indang registration, ownership documents, chassis aser engine numbers tamasa jangjatsüla. Senotsü magütsüdang tamasa official channels ajanga gari indang osang metettsü merangang ta Mon Police-isa metetdaksüogo.

Mongsenbai Councilor-i teintet rogotem asoshi “Free Eye Camp” katsü; lanurtem atema CMMFI teyari agitsü maongka lapoktsü



Mokokchung, 31st August (TYO): Mokokchung town kübok aliba Mongsenbai ward sangertemi moa, par MMC Councilor Imlisanen-i senotsü tenla-a teintet rogotem (senior citizens) atema angati tenük reprangba sentong ka parnok Community Hall nung ayongzüka katsüogo.

Iba “Free Eye Camp” sentong nung teintet rogo parnok 200 dak tali aruagi Eye Specialist nem tenük reprangdaksüba den angati mozü dena lema agütsü, aser tenük kanga majungertem tashibo operation agitsü aser iba senjia Councilor Imlisanen-isa agütsütsü.

Iba den külemi Councilor-isa par kiyonger lanurtem pei jangraba mapa balala inyaksü asoshi Chief Minister’s Microfinance Initiative (CMMFI) teyari aginürtem atema maongka lapoktsüba den lenmang sayuba sentong-a ka achayanga liasü. Iba sentong nung lanur 30 dak tali-i project balala atema apply sügo.

Tanü teintet rogo atema “free eye camp” aser lanurtem

atema “CMMFI” teyari dak sentakba mapa ana ya “MMC election mapang kü indang teinyaktsü tongtibang sangdongba rongnung densema lir”, ta Imlisaneni ashi. Iba mapa ya tanü tembanger masü, tarutsü nunga kiyonger anema aliba tsütsü mapatong balala inyaksü tebilemba lir, ta paisa metetdaksü.

Ano Mongsenbai yimden den angatettepa Mongsenbai Sub-Centre jenjang tajungba kümdaktsütsü asoshi nüngdakba osettem (medical facility) kar bener arutsü merangdaki, ta pai ashi.

“Kiyong nung tantsür-tamburtemji ni kü tsürabur amai dang bilemer. Kiyong nung koda masür mokokmeiner aser timtemer aika lir, talisa tenük majunger aika aliba ngua iba angati eye camp ya katsütsü lemtet. Ano tarutsü nunga parnok anema alitsü asoshi maparen karbo inyaksü bilemdar”, ta paisa lemsatep.

Tanü sarkar mapa angutsü kanga tasak kümogo, kechiyong sarkar mapaji kanga apara. Anungji, tanü joko lanurtema

mulungsentsü (minset) melenshir, tangar dak metaloka meli-i pei sasa mapa apiteta meranga inyaker chijema alitsü asoshi lenmang bushitsü nüngdaker. Aji oda, CMMFI ya asenok asoshi maongka tajung lir. Yangi 100% nung 10% nai inoktsü, 30% subsidy aser 60% loan lir. Iba yagi lanurtem pei jangraba mapa inyaksü maongka nguteta lanur karbo pei taküm jenjang yanglutettsü teimla lir, ta paisa metetdaksü.

Kiyong nung lenla tabensa nungi Development Board ka tenteta lir, parnok ward yimden den angatettepa terenlok mapa balala inyaksü shisa tajung agütsüba den maparen ajak nung nungitba ajanga mapa ajak takok ngua inyaka arudar, ta paisa board züngsemtem dang pelaba lemsatep.

“Tebilemba aika lir saka ajakbo mayimjemteter, saka nia akokba tashi kiyonger aser Mokokchung town nüburtem asoshi inyaksü tejangraba nung shilem agia arudar, anungji, nüburtemi ano maneni shisa tajung agüja amalitepdaktsünür”, ta paisa mepishia metetdaksü.

Nagaland entrepreneurs anati Idea-baaz Startup Fest nung sempet angu

Dimapur, Luroi/August 31 (TYO): Nagaland nungi entrepreneurs ana, D Ledia Awomi aser L Chuba Lkr nati Ideabaaz Startup Fest 2026 nung Best Cultural Performance aser Best Aromatic Plant categories nung sempet ngua liasü. Ideabaaz Startup Fest 2026 ya Film Expo India den lungjemer Bharat Mandapam, New Delhi nung August 26 nungi 30, 2026 tashi munga liasü.

Ideabaaz ya startup investment aser edutainment

sapang ka lir, koba ajanga entrepreneurs aser startups nem pei tebilemba venture capitalists, investors, mentors aser industry experts den shisa lemsateptsü maongka agütsür.

Ledia Awomi ya Ethnic Group of Nagaland (EGON) indang tir lir aser lai Best Cultural Performance sempet angu.

Entrepreneur L Chuba Lkr-i Best Aromatic Plant Awardm shiba 2016 küm tenzükbä M/s L.C. Longkumer Agar Processing Unit kibur lir.

NSCN/GPRN nung Kilo Secretary melenogo



Dimapur, Luroi/August 31 (TYO): Kilo Secretary ketdangsür melentepba sentong ka August 31, 2026 nü agiogo, kong department nungi külem tenzüker aser nüburtem dena liasü, ta NSCN/GPRN indang MIP sangdong ka ajanga ashi.

Secretary tejenba Qhetoyi A. Swu-i Secretary tasenba Joseph Lotha nem teinyaktsü mapa tem amoktsü. Secretary

Swu-i pa mapang mapa inyakbatem asoshi tenüngsang agüja aser Kilo Secretariat nung tekolak tasen ama Secretary Lotha pelaa agizüka iba sentong ya agi, ta sangdong ajanga ashi.

Secretart Qhetoyi A. Swu lenisüba aser pa mapa asoshi pelaba lemsateper aser Secretary Joseph Lotha-i mapa tasen tenzükbä nung tajungtüba moatsür, ta NSCN/GPRN sangdong ajanga ashi.

ABAM-i Dimapur nung Aor medical doctor-tem ajuru

Dimapur, August 30, 2026 (TYO) : ABAM ajanga ayongzüka, Dimapur tesem nung aliba Aor Medical Doctors tem den mezüngbuba Telungjem Senden, Luroi 30, 2026 anogo nung kaogo. Iba Telungjem senden, Elim Hall nung, Dimapur Ao Baptist Arogo ajanga yimli tulu sayua agi. Telungjem senden nung Dimpaur tesem nung alir Aor Doctors tem 52 arua aten, aser online platform nung parnok 15 tensem.

Telungjem senden asoshi Lungjem Ratet Okila nung, Rev. Tamsü, Executive Secretary, ABAM, ajanga ABAM aser Medical Professionals lungjemer nebur anepaluba mapa nung tali awajema inyaksü nüngdakba shisem. Rev. Tamsü ajanga, Medical Institution ka asoshi mangdang aser nukla yangluba nung medical lu nung inyakterem shisatsü magiang, ABAM kisüng ajanga kecha mera agitsü makok, aser iba nukjidong nung iba Telungjem senden ayongzüker ta shisem.

ABAM aser Medical Professionals na telungjem nung inyaktettsüba indang jembisemdang, Executive Secretary ajanga pei luyimdak mongin shisatsü lemsatepba, tesayuba balala agütsütepba, medical camps ayongzükbä, lendong mapang rongdak teyari agütsüba, aser palliative care agütsüba nung teka amteper inyaksü maongka aliba shisem. Paisa tanü tendak lokti tuluba nung palliative care agütsütsüsa amalitep sabang tenzüksü, aser ibaji medical professionals temi pei talidak tesem nung shirnok teyari nüngdaker, itemji reprangteta tim teyari agütsüba ajanga ataloktettsü mangdang lemsatep.

Okila nungsa, Rev. Tamsü ajanga, tanü lokti ajak nung Arogo aser Doctors külemi lungjemer sabang tajung lapoka, Arogo nung Sannükertem aser Doctors temi pei wadang nung nüngdakbapur reprangtetta rangben aser tawajem teyari agütsüba nung shilem tajung

agitsü asoshi ajungshi.

Dr. Sashi, Impur Christian Hospital, Board of Trustees Chairman ajanga, ICH tenzükbä aser missionaries tem mangdang tajung yur Impur nung hospital amenokba telok nem rajemtsü. ICH nung palliative care ya joko mongin küma teyari agütsütsü mangdang yur tenzükbä telok dang shisem. ICH mangdang ataloktsü asoshi ANM School of Nursing aser General Duty Assistants training agütsüba, aser iba training ajanga nisüng 300 shi tesayuba tajung agütsür, tanü parnok 200 tema lenmang balala nung neburtem tenzükbä aser teyari agütsüba mapa nung nokdaka lir ta shisem. Dr. Sashi ajanga, ICH atema mangdang jibo tejangja yanglua lir, saka iba mangdang mapa akümsü asoshi temela masü, aser item ajak asoshi Aor Medical Professional teyari maneni nüngdaksü ta shisem.

Dr. Obangjungla, la palliative care atema training agiba, aser la tajangshiba nungi palliative

care ya kechi aser koma ka tanü tendak nung nüngdaka akümer, item terajem shisatsü lokti nem agütsü. Nagaland nung palliative care specialized MD doctor tanü tashi nung ka tang lir, aser Naga nung asoshi palliative care tsütsü specialized agirtem tenüngdakba indang nung lokti ajungmeso. ICH küm 114 lia arudang, palliative care tenzükbä aser tanü tashi nung Nagaland nung palliative care atema yipten 6 temeja agütsür aliba hospital ji Impur Christian Hospital ta lai shisem, aser külem medical doctors tem ajak iba palliative care nung tangazükba agir alitsü nüngdakba shisem.

Dr. Noktang ajanga Medical Doctors nungi tebilemba lemsatepdang, ICH atema tang rongdak nüngdakji nisung tashi (man power) nüngdaker ta ashi. ICH nung palliative care atema ano teyari peria agütsütsüji nüngdak, saka hospital ka nung nüngdaktem jenti aliba shisadanga, ano tanga lenmang balala nung

teyari aika nüngdaksü ta pai shisem. Dr. Noktang isa ICH tenzükbä ya missionaries mangdang tajung nung tenzükbä, aser tanü asen neburtemi iba süngjang agir asünung, külem medical doctors tem ICH asoshi inyaksübaji mission amai bilemstsüla ta ayongzükbä. Aor Medical Doctors tem joko noklang aika küma rentetter, anungji doctors temi külemi bangjemer aser teka amteper mapa inyak tenzükra, ICH jenjang tajung nung ajungkettsü ji tamakoktsü mapa masü, ta paisa shisem.

ABAM ajanga Aor Medical Doctors tem den iba ama Telungjem senden ano Kohima aser Mokokchung tesem nung ayongzüksü tebilemba lir. Aser item senden ajanga ABAM aser Aor Medical Doctors temi külemi lungjemer telemtetba tajung karbosa bushitetta, Impur Christian Hospital jenjang tajungba nung ajungkettsü tebilemba lir.

Kyrgyzstan nung PM Modi-i Iran Tir Pezeshkian den senden amen



August 31, 2026 nü Ato kilonser Narendra Modi 26buba SCO Leadership Summit nung adentsü atema Bishkek tonga aoba mapang Cabinet of Ministers of Kyrgyz Republic Chairman, Adylbek Kasymaliev-i pa agizükdang tangokba noksa nung angur.

New Delhi, Luroi/August 31 (Agencies): Hombarnü Kyrgyzstan yimtiba, Bishkek nung Shanghai Cooperation Organisation (SCO) senden aliba mapang nung Ato kilonser, Narendra Modi-i Iran Tir, Massoud Pezeshkian den jurila senden ka amen.

Taküm February ita nung Iran nung rara tenzükba sülenbo tang mezüng Modi aser Iran Tir Massoud Pezeshkian na senden amener.

Lenir anati linük ana tsüngda tesendaktep asadang aser maneni linük anaprong ajangzüksüsa lenla balala nung amalitepa inyaksü atema bangjem.

Kasa senden nungji Iran

Foreign Minister Seyed Abbas Araghchi den Iran nungi tongti ketdangsertema kar liasü.

Middle East nung tensa mejungi aliba mapang aser US o Iran na tsüngda rara aliba mapang ka nung Modi aser Iran Tir na senden amen.

Iran atema shishilembaba partner top 10 linüktem rongnung India densema lir, ajisüaka Strait of Hormuz shibangba aser America-i Iran anema tenokdangba aika benoka aliba ajanga India aser Iran na tsüngda shishilembaba kongshiogo.

June ita nung Modi aser Pezeshkian na phone ajanga sensaksemba mapang nung Iran Tiri Modi nem Middle East

tensa metetdakja liasü.

Hombarnü senden amenba mapang nung Pezeshkian-i, Iran-i rara maginer saka onok anema inyaktertem anemabo nokdaksü, ta ashi.

Paisa, Middle East nung tensa majungba ajanga linük ajak kongshir, ta ashi.

SCO senden aliba mapang nung Modi-i Armenian Ato kilonser Nikol Pashinyan-a ajuru. Lenir anati defence, rongsenkettzüng, pharma, science & technology, sobaliba aser shisaliok sectors nung maneni amalitepa inyaksü jembiba den külemi regional aser International onüktem nung pei tebilemba lemsatapa liasü.

Delhi nung draft electoral roll sangdong; voters lakh 47 züngdok

New Delhi, August 31 (Agencies): Hombarnü Delhi nung draft electoral roll sangdongogo; draft roll nung voters lakh 47.7 züngdokogo, ta Delhi Chief Electoral Officer-i metetdaksü. Draft roll nungi züngdokba voters ji Absent, Shifted, Dead, Duplicate and Others (ASDDO) categories kübok "uncollectable" ta züngshia draft roll nung mezüngok.

Delhi CEO-i, draft roll nung züngdokba voters-i September 30 anogo tashi nung Form 6 den külemi nüngdakba documents agüja temepishiba agütsütsü akok, ta metetdaksü.

Final electoral roll ji taküm November 4 nü sangdongtsü.

Draft Roll nungji voters lakh 97.5 lir.

Special Intensive Revision (SIR) kübok house-to-house enumeration exercise June 30 nü tenzüka liasü aser August 17 nü tembang.

Iba exercise agiba mapang nung Delhi nung voters 1,45,10,299 nungi shilem 67.18 indang forms digitised süa liasü, ta Delhi CEO-i metetdaksü.

Delhi draft roll sangdongba sülen Aam Aadmi Party (AAP) national convenor aser taoba mapang Delhi Chief Minister, Arvind Kejriwal-i Election

Commission-i voters roll nungi lakh aika züngdokba atema aitsü.

Arvind Kejriwal-i, SIR exercise ajanga India nunger nütsüng crore 140 aliba nungi crore 50 dang akümstsü, ta metetdaksü.

Pai X ajanga, "SIR kübok Delhi nung draft voter list sangdongogo. Crore 1.5 nungi voters lakh 47 züngdokogo. India sorkari nüngdak makaba nung nütsüng atema shisabulur. SIR ajanga Election Commission-i asen linük nung nütsüng crore 140 aliba nungi crore 50 dang kümdaksütsü," ta metetdaksü.



Prayagraj (Uttar Pradesh), August 31, 2026: Prayagraj nung Ganga ayongkümlen tzü tali metsüngba agi nisungtemi pei talidak toktsür aodang tangokba noksa nung angur.

Nepal tzümetsüng lendong nung asürtem tasü mang 13 UP nung angu

Kushinagar, August 31 (Agencies): Nepal nung tzümetsüng lendong atalokba sülen anogo pongububa tashi nung Uttar Pradesh kübok Narayani-Gandak ayong nung tang tashi nung tasü mang 13 ngutetogo, ta ketdangsertemi metetdaksü.

Uttar Pradesh kübok Kushinagar nung anguba tasü mang 13 ji tebur trok aser tetsür tenet tasü mang lir, ta ketdangsertemi metetdaksü.

District administration aser State Disaster Response Force (SDRF) teams-i iba ayong nung Nepal nungi ponger aluba tasü mang den shiruru tasü manga aika nguogo.

Kushinagar nung aliba ayong nung anguba tasü mang 13 nungjagi tasü mang trokbo Kushinagar Medical College nung yua lir aser tasü mang tenetbo Gorakhpur nung aliba All India Institute of Medical Sciences (AIIMS) dangi yokogo.

Kushinagar in-charge District Magistrate, Vandita Srivastava-i, lateta aliba inyakyim nung ajemdaker item tasü mangji wazüka ayur aser nüngdakba inyakyim ajak benshidar; post-mortem examinations agiba densema inyakyim ajak benshiba sülen tasü mangji Nepal administration nem agütsütsü, ta metetdaksü.

District administration-isa

item tasü mang dak sendakba osang tejangja Ministry of External Affairs (MEA) ajanga Nepal den lemsatepogo.

Ano külen Uttar Pradesh kübok Maharajanj district nung aliba Narayani-Gandak ayong nung ngutetba tasü mang pezübo post-mortem examinations agiba sülen Nepal ketdangsertem ket tongtsüogo, ta ketdangsertemi metetdaksü.

August 27 nü ngutetba tasü mang pezü Maharajanj district hospital mortuary nung yua lir, post mortem agiba mapang nung tasü mang pezüprong nungjagi DNA samples agizükogo.

Additional District Magistrate Prashant Kumar-i, DNA dak sendakba osangtemji Nepal administration den lemsateptsü, ta metetdaksü.

Maharajanj nung August 27 nü Gandak ayong nung tasü mang asem angu aser August 28 nü tasü mang pezü nguteta liasü.

Uttar Pradesh kübok Maharajanj ya Nepal den arrtsülen lir. Nepal nung ajungben tzümetsüng lendong atalokba sülen nungi district administration-i ayong nung tzü level asadanga arudar.

Hombar tashi nung Nepal tzümetsüng lendong nung asürtem tasü mang 903 ngutetogo aser tang tashi nung samaba nisung 4,247 mangur.



August 31, 2026 nü Mumbai nung aliba Naval Dockyard nung Indian navy rong 'INS Nipun' semzüksü lia tangokba noksa nung angur. Iba rong ya India nung yangluba Nistar-class Diving Support Vessel (DSV) rong lir.

Centre-i NEET longkak aitertem anema benoka aliba FIR agentsü mepishi

New Delhi, August 31 (Agencies): Centre sorkari Supreme Court dang Delhi aser state balala nung NEET paper leak asüba anema longkak aitertem anema benoka aliba FIR ajak agentsü atema mepishio.

Hombarnü sorkar tenüng nung Solicitor General Tushar Mehta-i Chief Justice of India Surya Kant-i aniba bench dang FIR ajakji agentsü mepishi.

Centre-i Supreme Court dang linük temzüng kübok Arrla 142 nung aliba tashi

amshia longkak aiter kaketshirtem anema benoka aliba FIR agentsü mepishi.

Supreme Court-i iba ken o ya maneni September 1 nü angadangtsü.

Ano külen tanga osang ka nung, Cockroach Janta Party (CJP)-i September 5 nü Delhi nung longkak aita jajatsü ayongzüka lir.

Sorkari longkak aitertem dang nangzükba mataloktsür, ta shia CJP-i longkak aittsü.

Parnoki India Gate nungi Delhi Police headquarters tashi longkak aita jajatsü.



TIR YIMYIM YIMOBILEM (EDITORIAL)

DIMAPUR TUESDAY, SEPTEMBER (RONGJUI) 01, 2026

Nütsüng nüngdaker

Asenoki asen lima nung shishilembadak 'Shopping Mall' tulu yangluner, kaketreju school, college aser university aser mozü ki tajung tulu lapokner saka itemji melapokdang aiben bilemdangtsüsa adoker, kechiyong item mapatem tenzüka inyaktsüba nungji sen aika aotsü aser sen endoka awazüba yariji tajangzük angutsüla. Aji oda, dokan ka lapoktsü asoshi asenoki bilemra, tamasa iba tesem nungji talir, consumers, kwi lir ta bilemdangtsüla, kechiyong talir melira dokan lapokbaji takoksa asütsü. Kasaji, asenoki tesem kar nung kaketreju lapoknura, iba tesem nungji kibong kwi lir, nütsüng kwi lir aser kaketrejui aotsüsa tanurtem nütsüng kwishibo lir ta asadanga metetmatsüla. Kasaji, asenok kari mozü ki ka lapoknura, iba tesem nungji nütsüng kwi lir aser parnokji rongsen jenjang koma ta tama asadanga metettsü nüngdaker, kechiyong nütsüng melira kaketshirtema malitsü aser nütsüng melira mozü ki lapok langa shirangertema malitsü. Ajisüaka, asenoki aiben itemji mebilemdanger aser masadangi peii jangraba agi mesüra sen aliba agi item business-temji lapoker, saka talir malinungji dokan tulu lapokyonga ita ishika tsüngda shibangtsüsa akümer, kaketrejutem nunga tazüngerter mali aser mozü kidangia shiranger marur ta mapang tatsüka lapokdang shibangtsüsa akümer. Atangji, tangbo asenokia item nüngdaktemji aikati rajema alitsü, ibayongji kechi mapa inyaktsü bilemdir, iba sentongji mapa kuma metenzükdang tamasa temetettsü nüngdaktem ajak 'Data' bendener aser iba jagiang asenoki bilemba sentongji inyak alang asü malang jangjar. Iba amaji asenoki 'data' mebenden ser tapi agi lapokba agi mapang tatsüka lapokerbo takoksa tulu nung shibangba 'Shopping Mall' aser dokan aika ngur alitsü. Kasaji, kecha 'data' mebenden ser Nagaland government-i school lapokba agi school kar nungbo school tanurtem dang nungibo tesayurtem teimba aliba angashir. Kasaji, Nagaland government-i college lapoktsü saka tazünger anasemka dang aru, anungji tazünger anasemka jagibo college metenzüktet. Kasaji, mozü ki lapoktsür saka doctor meyoker, kechiyong mozü ki kwi nung doctor kwi nüngdaksü ta asüba 'data' jia asenokibo meinyakteter. Aji oda, nisungtem nüngdakba sentongtem dokan lapoktsü sülü, mozü ki aser kaketreju lapoktsü sülü asenok ket nung sen dang masü saka nütsüng peria alitsüla, kechiyong nütsüng asoshi dang itemji nüngdaker. Atangji, nütsüng renloktsü asoshi akok tashi kibong ajak nung Tsüngremi dang motsüra, akhi tsürabur mapang nung amato tanur aiyyila asotsü merangtsüla. Iba denji ano asen lima nung tangartem sadema arua alitsüsa mapa akatsüla aser yimjung alitsüla. Aji oda, asen lima nung development project tulu tenzüka inyak nung, yangji inyaktsü purtem bendangertem asüyonga aika arua asenok aden alitsü. Atangji, parnokji ILP nüngdaksü saka mapa inyaktsü purtem asoshi ILP-jia mapang talanglang asoshia agütsür, anungji parnokji asen lima nung mapa inyaka mapang talangka litettsü. Idangji, parnok chiyongtsü aser nüngdak ajak asenok dang alitsü, par chirnurtem asenok kaketreju nung azüngtsü aser parnok shirangdang asenoki lapokba mozü kidang anepalutsü. Iba amaji ka kodang asenoki asen lima ya nütsüng agi kuma aliba lima ka kümdaktsüdir, kechi mapa tenzüka inyakdir inyakaka, asenoki dang junga inyakra tajangzük keta inyaktettsü. Aji oda, Shopping Mall, kaketreju aser mozü ki tama masü saka nütsüng tama teimba kümdaktsütsü nüngdaker. Atangji, nütsüng dang peria lira gari-i dang masü saka train-ia aser tayimtsü-ia asenok bushia arutsü. Tanü asenoki item 'Development idea' aser nüngdaktemji angatettsü junger.

OLEMSABANG

LIM AROGO AJAKI PEI-i AKOKTSÜBA MAPA DANG INYAKTSÜLA

~ L. Kika Pongener

(Maneni asüng adok nung...)

Kechiba sura manem-shilo ajak nung pei alidak arogo-i semdanga yarir aser tasü-tama nunga pei alidak arogo-i 'Asü-pila' sentong (Funeral) agitsür. Anungji mungdang-ia suang; lim arogo-ia suang; pei-i akoktsüba Project dang yanglutsüla. Bendanglen alir dak yimlar Project kecha meyanglutsüla. Tanü putu nung lim arogotem nung; benjong-bentsü; jubilee-mong, lokti-senden aser sentep-senji sentong tapu-tapu yanglur amonger; aser item nungdem nungji tasa tapu balala agi khangtepa saruba aser temulunger tenla saruba agi kibong aika nem timtem agütsür. Idangji, nubur aika telung nung nem-nema tai menadaksür. Aji oda, takokeri pei sasa mulungteter tenla agütsüba ajibo sadem-sadema lapoka dang lir.

Anungji lim arogotem-ia suang; mungdang-ia suang; kibongtem dang tenla-tenji aser tasa tapu-tapu agi saru saruba ya joko anentsü merangtsüla. Kokrabangla, mungdang dangi lokti balala nungi kechi tenla/saru arudir; mungdang senpong nungi dang agiteta agütsütsüla; kechiyong tangpo lim arogotem ajaki tershilem percentage agütsüba agi mungdanga kangarabo timtem malitsü sudi ta bilemer. Ano lim arogotem dangi kechi tenla/saru arudir; arogo tulu/takar-ibo; arogo senpong nungi dang agiteta agütsütsüla. Hau....lim arogo ajakbo tashi küsa masü; arogo tila/sensaker arogo-ibo ibaji makoktsü; saka arogo tulutemibo kibongtem dang mesarui karbo arogo-i tongzüktsüla. Aji oda, mungdang aser lim arogotem nung tenla-tenji ya tang amaisa ora; lia lia tenla-tenji aser saru-saji yagi laakteter; tamanger ya tajemba-tajemba dang kuma aotsü amai nukla nung angur. Jokorla, sensaker/tilar kibongtem karibo tamangang mamangli ta ola adoker. Anungji arogo aser mungdang-ia tenla-tenji ya terabo tajemba akümtsü merangtsüla. Asen nubur aikati bangpettsü amai linuk tenzüker, nujiso bushirtemi saru-saji aser temelen saru (Tax) tali sarur ta jembir....Saka jungjunga reprangdangra; tema nung alir lokti balala saru-ang teimba sarur....Aser ano mungdang aser lim arogotem-ia tenla-tenji ya aika-sa sarur. Aji oda, item tenla aser sarujia temelen saru (Tax) saruba denji kecha tepila mali asütsü.

Asenoki asen lima nung sorkar, yimden aser loktiliba nung ochimashi inyakba indang jembir; saka lim arogotem aser mungdang nunga; ashiko, ketdangsuba nung nuburi ashishitsüsa aser tamang makatettsüsa inyaka alitsü akok. Ano mungdang aser arogotemi kibongtem dang khangtepa tenla-tenji sarudang; ashiko, kibong karbo iba tenla aser saruji agütsütsü mechi aibelena alitsü akok. Yisu alima nung alidang; Yirusalem tenlaki telung nung shishilempaba; sen melenba; rakzükrakdemer leprungki mesuka kümdaktsüba ama....Tanü arogo aser mungdang nung Tsüngremi mepelatsüsa ochimashi, ambangyim, meru-meru aser tashiyim mapa inyaka lira...Yisu-i tarepba lisu agi repa kimai arizüka yokba ama; item mapatemji tamasa meruktettsüla. Mungdang aser arogotem nung ketdangsuba mapa ajak nung; sorkar aser tanga lokti ajak dang ochishia inyaka sayutsüla. Anungji arogo aser mungdangi tenla saruba; mesura tasa balala agi khangtepa saruba ya terabo anentsüla. Ajak dang alia, lim arogo ajaki pei tashi yari; pei arogoi akoktsüba 'Project' dang yanglutsüla. Tangar dak yimlar sentong kecha matongtsüla. Asenok tema nungpo anemsu agi tenungsangteptsü aser telung nungpo tai menatepa nem-nemtsü ta mesui; indang-indanga metongshitepd. Iba ocet ya arogo kar dak kisung rangloker zülur masü....Saka lim arogo ajaki tim amai angateta melenshidi ta nungsen arema zülur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Russia nungeri Khristan mission office aser kiojen raksatsü



Ukraine nung Ukraine for Christ mission indang kiojen ka nung chiyungtsü aser teyari oset balala rizünga aliba noksa nung angur. August 28 nikongdang Russia nunger sepaitemi amakdang iba kiojen samatsüogo.

August 31, 2026: August 28, 2026 nikongdang Russia nungeri bomb amshia amakdang Ukraine nung Khristan ministry indang office ka den kiojen raksatsü. Office aser osettsüset rizünga kiojenji Khristan mission 'Ukraine for Christ' indang liasü, ta parnoki Facebook post ka ajanga metetdaksü.

Ukraine for Christ-i, "Tangbo ajak raksatsüogo: chiyungtsü, osettsüset, hadir, generators aser gari ajak raksatsüba den külemi nüburtem nem agütsütsü rizünga aliba chiyungtsü aser osettsüset ajak samatsüogo," ta metetdaksü.

Nüburtem nem teyari agütsütsü atema osettsüset rizünga kiojenji ministry indang medemer kar meyong liasü.

Ukraine for Christ-i tesüiba küm pezü tsünga chiyungtsü parcel 175,000 lema agütsüogo.

2022 küm June ita nungi Khristan mission jagi iba kiojenji amshia liasü. Germany, Netherlands aser Austria nung aliba partner organization-i tesüiba küm pezü tsünga teyari oset toüzük 600 metric tons agütsübaji iba kiojen nungji rizünga liasü.

Arogo aser charity telok balala nungi volunteer 1,000 dak temai timtemba nüburtem nem teyari agüja liasü.

Tesüiba küm pezü tsünga denomination balala nungi Arogo 300 den melungtet teloktemi Ukraine tesem balala nung teyari agütsüba maparen nung yaritepa aruogo.

Ukraine for Christ-i Ukraine nung aliba Ministry for Veterans Affairs, Military Chaplaincy Service of the Ukrainian Ground Forces Command, juvenile police aser Orthodox Church of Ukraine den yaritepa aruogo.

Ukraine for Christ-isa senotsü teyari agütsüba dang masü saka sarasadem ajanga-

a yaritepang, ta mepishia metetdaksü.

"Onok nem shisatsü aser tashi agüjang ta sarasademjang. Iba ya tatembang masü. Tenzükba mapa maneni inyaksü atema Tsüngremi onok nem maongka maneni agütsütsü aser anogo shia Ukraine nung aliba nüburtem den Khrista osangtajung lemsatepa teimla agütsütsü," ta Ukraine for Christ-i metetdaksü.

Ukraine for Christ-i 1991 küm nungi Campus Crusade for Christ International ministry mapa inyaker. Iba mapang nungji bendanger missionary tem Ukraine-i arua liasü.

Tangbo Ukraine for Christ nung staff 140 dak tali lir.

August ita tatembanglen Russia nunger sepaitemi Ukraine nung aliba region aika maakogo.

Ukraine agriculture minister, Taras Vysotskyi-i, August 28 nü Russia nungertemi amakba mapang nung osettsüset rizünga kiojen aika samatsüogo, ta metetdaksü.

2022 küm February ita nung Russia-i Ukraine amak tenzükba sülen Ukraine nung Tenla ki aika raksatsüogo.

Ukraine nung rara tenzükba sülen küm pezü ajungba mapang nung International Religious Freedom or Belief Alliance chair, Robert ?ehik-i, Ukraine nung yimsü dak sendakba kiojen 800 dak tema raksatsüogo, iba nungjagi kiojen 100 shibo meshimeshia samatsü aser Khristan lenir 800 dak tali süogo, ta metetdakja liasü.

Anogo ishika tejaklen Ukraine nung 3buba National Prayer Breakfast sentong ayongzüka agia liasü. August 23 nü iba sentong nungji linük 17 nungi nisung 1,500 dak tali aden.

Iba sentong nungji World Evangelical Alliance (WEA) Secretary General Rev. Botrus Mansour-i alima nung evangelical Khristantem atema

sarasademtsüba den külemi Ukraine pusemertem dang lakzü-lakpong mesüi maneni yimjung atema inyakang, ta ayongzük.

Kasa sentong nung Ukraine Ato kilonser, Sergii Koretskyi-i, Russia nunger sepaitemi Ukraine nung Tenla ki aika raksatsüogo aser parnoki atsünga agiba teseitem nung Khristantem reshikangshir, ta metetdakja liasü.

India nung Khristan organizations-i Nepal den mangyim jashi lemsateper

August 31, 2026: August 26, 2026 nü Nepal nung ajungben tzümetsüing lendong nung nisung noklang aika asüba den meyrjang aika samaba sülen India nung aliba Khristan organisation aikati Nepal den mangyim jashi lemsatepogo.

Ajungben tzümetsüing ajanga Nepal kübok Rasuwa, Nuwakot, Dhading, Gorkha, Tanahun, Nawalparasi aser Chitwan district tem kongshi aser tasü mang karbo kilometer 240 tashi ponger lua India nung ang angu.

All India Catholic Union (AICU)-i sangdong ka ajanga, iba lendong nung takoksa angurtem atema mangyimtsür, ta metetdaksü.

AICU-isa, iba lendong nung nisung 734 asüba jangjaogo aser nisung 2,498 samaogo, ta metetdaksü.

AICU National Tir, A Chinnappan-i, "Onoki Nepal aser China na nung mangyimba kibongtem den tejashi lemsateper. Iba ama lendong yagi arrtsü kecha mebendanger. Nepali nunger yimdaklirtem, China aser India nunger aayangertem aika kasa tzü lendong nung samaogo. Onoki iba lendong agi kongshiba kibong ajak den mangyim jashi lemsateper aser sarasademtsür," ta

ANOGO ABEN TSÜNGREM DEN

Tsüngrem sentong kü meyong

"Nenok taküm lungtem ama, Yisu Khrista ajanga Tsüngremi agizüktettsü tanela tenlatsü, temeshi putir telok asütsü asoshi, tenla ki ka küma nenok yangluang"
1 Peter 2: 5.

Tsüngremi maneni kisüba sentong inyak, Israel nunger den masü, saka bendangertem den. Pai kin balala nungi lungtem benden aser taküm lung den medentepa yanglu. Iba sentsüwangshi sentong tanüa Tanela Temeshi ajanga inyaker, tanela ki yanglur.

Iba kidang tarongba tenla agütsütsü asoshi putir alitsüla ta Peteri zülu. Item putirtemji shirnoki asütsü? Parnoki Levi kidong nungi agitsü asü? Masü. Shirnoki taküm Lung den metenloktepa lir parnok nungi agitsü. Yisu Khrista ajanga parnoki parnok mapa tanela tarungba tenla agütsütsü.

Tamanger shia tanela kidang tanela tenla agütsür putir ka ka lir. Shinga putir asütsü ajaba aser tenyaba mapa nungi jenbua mali.

Shiruru aser oset tenlaba melen Khrista lir. Telung nung agiba tola dang nungi Khrista temeshiba sobutsü kar. Shiruru tenla masü taküm aliba tenla pai aginür. Putir ka ama asenoki taküm aliba tenla agütsütsü akok.

metetdaksü. AICU-isa shidi ka ajanga Apostolic Vicariate of Nepal nung Apostolic Administrator, Silas Bogati den mangyim jashi lemsatep. "Iba lendong ya Hindu nunger Teej benjung aser Nepali nunger benjung mapang ka nung ataloka benjung agi mangyimba mapang ka dang kümdaksü. Himalaya tenem nung rürjep dak sendakba lendong jelia asadangtettsü atema Nepal aser China nati amalitepa inyaksüla," ta shidi nungji shia lir.

August 29, 2026 nü Catholic Bishops' Conference of India (CBCI)-ia, iba lendong ya Glacial Lake Outburst Flood (GLOF) ka liasü ta shia mangyimertem den tejashi lemsatep. CBCI Tir Cardinal Poola Anthony-i, "Onoki nenok den mangyim jashi lemsateper aser asürtem dang Tsüngremi taochi sayuang ta sarasademtsür. Onoki tang tashi mengutetba nisungtem atema sarasademtsür aser kümzüka maparen takok angutsü atema sarasademtsür," ta metetdaksü. CBCI-isa kümzüka maparen aser teyari agütsüba maparen inyakertertem atema sarasademtsür, ta

metetdaksüba den külemi India tesem ajaklen Arogotem aser tamangertem dang August 30 nü tekülem sentong nung takoksa angurtem atema sarasademjang, ta mepishia metetdakja liasü. Evangelical Fellowship of India (EFI) General Secretary, Rev. Vijayesh Lal-i, "Iba ama lendong ataloker aliba mapang nung onoki Nepal nungertem atema bilemstsür," ta metetdaksü. Paisa, iba lendong nung Tenla ki 15 nungi 25 shi raksaogo aser asürtem rongnung pastor tem aser Arogo nung lenirtema densema lir, ta metetdaksü. "Rev. Dr. Kiran Kumar Das leniba nung National Churches Fellowship of Nepal aser Nepal Christian Society-i teyari agütsüba maparen inyakba den asentenshir yangershiba mapa inyakdar. Onoki yangji aliba lenirtem den tongtepratepdar, Nepal atema sarasademtsüdar aser India nung aliba Arogotem dang tenla tajung agüjang ta ayongzükdar," ta paisa metetdaksü.

Rev. Lal-i, India nung aliba Arogotem ajak dang Nepal atema sarasademtsütsü ayongzüker aser NCF Nepal (NCFN) nem indangindanga tenla agüjang ta mepishir, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Zütok

(v) mezüngsemi toktsü (missed in counting)

* Parnoki tagitsü alem dang ni zütok.

Zütokzūra

(v) mebeni toktsüba, tokshitokra (things left behind)

* Telok senzüdang taintemi teti zütokzūra ali mali repranger.

OLONG PAITEP # 7636

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S ____ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizügdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7635 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER

Delhi Metro nung mapa inyaker kati mapang tekaratiba nung Delhi Metro stations ajunga sema senzüba atema Guinness World Record ka yangluogo.

Iba nisung ya Prafull Singh lir aser pai May 23, 2026 nü ghonda 14, minute 54 ser second 36 nung Delhi Metro stations ajunga semteta liasü. Anepdang 6:00 ako meta pai Violet Line nung Raja Nahar Singh Metro Station nungi tenzüker aser aonung 9:00 ako meta Gurugram nung Millennium City Centre station nung tembanga liasü.

GMC nung proton beam therapy facility amenoktsü

Guwahati, August 31, 2026

(Agencies): Assam Cabinet-i Guwahati Medical College (GMC) nung Rs 600 crore endoka proton beam therapy facility amenoktsü mulunga agizükogo.

India nung public healthcare system nung iba ya mezüngbuba proton beam therapy facility asütsü ta Chief Minister Himanta Biswa Sarma-i ashi.

Linük nung public aser private sectors nung iba technology agütsüba hospital tasembubaji Guwahati Medical College asütsü ta pai ashi.

Proton beam therapy ya cancers kar anepalutsü atema amshir aser radiation delivery tajungba sütetba ajanga healthy tissues kangabo meraksatsür. Iba facility ajanga Assam aser linük kübok tanga tesemtem nungi shiranger aika ajangzüksü imlar.

Assam Cabinet-isa state kübok tesem balala nung capital-intensive projects atema Rs 50,000 crore package agizükogo.

State senpong nungi, National Bank for Agriculture and Rural Development (NABARD) dang

apua aser Central government schemes kübok funds balala amshia mapatongtem inyaksü ta CM Sarma-i metetdaksü.

Iba package ya primary healthcare infrastructure, schools aser Anganwadi centres ajungketba den tea garden workers indang housing nung temulung agüja inyaksü.

Maneni, Assam nung road aser power networks tashi itshitsü atema senotsü lemzüksütsü aser shilem kati anti-flood embankments akangshitsü ta CM Sarma-isa metetdaksü.

Mizoram nung drug rehabilitation centres 48 lir

Aizawl, August 31, 2026

(Agencies): Mizoram nung care aser rehabilitation services agütsüba centre aser homes 48 lir aser item ajanga drug addiction agi kongshia aliba nisung 5,224 yarir ta ketdangsürtemi ashi.

Taküm asoshi state sorkari item centres aser homes nem Rs 42 lakh senotsü teyari agütsüogo ta ketdangsürtemi ashi.

Külen, nisung 2,255 tashi 'Hulhliap' short-stay centre nung anepalutsü atema anioka liasü. Iba

ya state sorkari lapokba detoxification facility ka lir. Yaküm June ita lapokba sülen batch 9 tashi anepalua aruogo.

Mizoram sorkari batch 9 anepalua aruba nung Rs 3.86 crore tema endokogo aser iba facility nem tangalen nungi Rs 1.34 lakh teyari nguogo ta ketdangsür kati ashi.

'Hulhliap' short-stay centre ya yaküm June 23 nü lapoka liasü. Iba centre ya Aizawl anasa Synod Revival camping centre, Neihbawi

nung lir aser detoxification facility nung khen nungi nisung 200 shi amungtsü akoker.

Iba centre nung anogo 15 nü doctors, nurses aser counsellors lenisüba kübok detoxification treatment agütsür aser iba sülen specialised spiritual counseling agütsür.

Iba facility nung amungba sülen nisungtem pei kinunger mesüra tanga rehabilitation centres-i yoker ta sorkar ketdangsürtemi ashi.

NFR-i Hill Section nung Train Services melenshir

Dimapur, August 31, 2026

(TYO): New Harangajao station anasa railway tracks (Line-1 and Line-2) yanglushiba ajanga Lumding-Badarpur Hill Section nung Line-3 ajanga dang train senzüba agi temelenshi kar lir ta Chief Public Relations Officer Kapinjal Kishore Sharma-i sangdong ka nung ashi.

Northeast Frontier Railway (NFR) ajanga tsünglanglen agüja

aliba train services melenshir ta paisa ashi.

Cancellation of Trains:

Train No. 15615 (Guwahati-Silchar) Express - 01.09.2026 nungi apusotsü aliba athir.

Train No. 15616 (Silchar-Guwahati) Express - 02.09.2026 nungi apusotsü aliba athir.

Rescheduling of Trains:

Train No. 15650 (Narangi-Agartala) Express - 01.09.2026

nü apusotsü aliba Narangi nungi 18:30 hrs nung apusotsü.

Train No. 15628 (Silchar - Coimbatore) Express - 01.09.2026 nü apusotsü aliba Silchar nungi 22:10 hrs nung apusotsü.

Regulation of Train:

Train No. 15625 (Deoghar - Agartala) Express - 31.08.2026 nü tapet mapang nung apusotsü.



Arunachal Pradesh kübok Naharlagun Police-i tesem balala nungi two-wheelers 12, gold & silver ornaments aser tanga auyaba osettem aika ngutetogo. Naharlagun, Banderdewa, Nirjuli aser temeket nungi auyaba ken o tem benokba sülen bushisügdanga arudang two-wheelers aser tanga osettem ngutetogo. Arunachal Pradesh aser Assam nung tesem balala mita aodang gari aser tanga auyaba osettem ngutetogo ta police-i ashi.

Nepal tzümetsüng nung asür 900 alemogo

NISUNG 4,247 KONG ALIAR MEJANGJAR



Nepal tzümetsüng lendong nung asürtem Devghat nung aremtsü Armed Police Force ketdangsür temi leper bushia bener oa yutsür arudang tangokba noksa nung angur.

Kathmandu, Luroi/August 31 (Agencies): Nepal tzümetsüng lendong nung asür nisung 900 alemogo aser district aika nung ayongkum nungi nisung tasü mang ngutetba manener.

Nisung tasü mang ngutetba 903 jungogo, tasü mang timtiba ya southern Chitwan district nungi lir (272), kong ketdangsür temi item tasü mang ketdangsütsü timtemer, ta National Disaster Risk Reduction and Management Authority (NDRRMA) ajanga Hombarnü ashi.

Iba sülen Chitwan nung aliba ketdangsürtemi nguteta aliba tasü mang timba Kali Gandaki aser Trishuli ayong na lungtepdak, Devghat nung rema toktsü. District nung tashidak adokba tesem ka mekümdaktsütsü atema iba

mera ya agi.

Tasü mang tem maremdang ketdangsürtemi tasü mang nungi DNA samples agizük, ta District Administration Office, Chitwan ajanga ashi.

Mejangjaba tasü mang aika district balala nung aliba mozüki 21 nung yua lir aser kinungertem dang jangjatsü atema official records reprangtsü ajungshir, ta NDRRMA ajanga ashi.

NDRRMA ajanga ashiba agi, nisung 4,247 den osangtsü sang magitepteter aser yangji bendanger 592 dena lir. Bhotekoshi aser Trishuli river corridors nung aliba hydropower projects balala nung inyaker nisung 933 den osang magitepteti lir, aser ketdangsür temi India aser China nungi technical team tem den yaritepa hydropower projects balala nung longpok

nung shibanga aliba nisungtem agizü ktsü meranger.

Nepal-China arütsü nung iba lendong agi kongshiba sülen Nepal Army, Nepal Police, Armed Police Force personnel aser tanga sorkar mapa inyaker aika den osangtsü sang magitepteti lir. Iba lendong nungya nisung 267 yiru aser nisung 156 mozüki nungi yokogo.

Tang tashinung nisung 10,451 kumzüka lir aser yangji bendanger 252 aser Nepali nunger 3,344 Nepal Army-i tayimtsü amshia operations ajanga kumzü k, ta NDRRMA-i ashir.

Search, rescue aser relief operations atema security personnel 20,819 yoka lir aser yangji Nepal Army personnel 8,722, Nepal Police personnel 7,894 aser Armed Police Force personnel 4,203 lir.

Cyprus rong lendong nung nisung 8 asü, 18 samar bushir

Kyrenia, Luroi/August 30 (Agencies): Cyprus north tsütsü nisungtem amenba rong ka makepokba sülen nisung ti süogo aser ano nisung 18 samar bushir, ta yangji Turkish administration tekolakbai ashi.

Cyprus nung Turkish republic indang ato kilonser Ünal Üstel-i ashiba agi, Deobarnü rong nungya passenger 259 aser rong ketdangsür ti mener tzükumlen aliba Kyrenia jila nungi ayamesoba sülen rong telungi tzü ait tenzü k.

Iba lendong atalokba indang bushisü ngdangba nung shilem ka ama rong anisang aser rong ketdangsür tenet pua lir, ta Üstel-i social media nung ashi.

Rong nung alir timba kumzü kogo aser Turkish ketdangsürtem den külemi search and rescue operation tenzüka lir ta ketdangsür temi ashir.

Rong ya tzü yim telungi luogo aser ketdangsürtemi iba lendong atalokba jangjatsü atema black box recorder agitettsü meranger.

Iba rong ya sorkar indang masü aser nüngtugu Kyrenia holiday resort nungi anü ngdang 12:30 ako (par mapang) meta ayameso.

Rong ya Deobarnü Turkey-i aotsü liasü saka tzü ngsang majungba mechi mapang atsülang, ta Üstel-i ashi.

Rong nungya tzü sem agi anaben kongshiba sülen makepok, ta pai Turkish media outlet TRT dang ashi.

Rong anisangi mezü ng tzü sem agi kongshiba sülen rong anitettsü merangba mapang tanabuba tzü sem agi kongshia rong telungi tzü ait tenzü k, ta pai

ashi.

Helicopters aser coastguard rong tem iba lendong atalokba tesemi yokogo aser tzükum nung ambulances tem atatepa lir.

Tang asoshi mezü ng teinyaktsü ji nisung takum kumzü ktsü ya lir, aser yangji security forces, rescue teams aser health ketdangsürtem oa lir, ta Üstel-i social media nung ashi.

Iba lendong kanga junga bushisü ngdangtsü aser metokmeperi tilatiba jia kaktettsü aser shiba südir süaka aibelener nem tatok magütsütsü, ta pai ashi.

Rong nung mena alir nisung 100 tzükum bushia anir aruogo, ta pei sasa sangdongba Turkish Republic of Northern Cyprus (TRNC) indang transport minister Erhan Arikli-i ashi. TRNC ya Turkey kisü ngi agizüka lir.

Turkey Tir Recep Tayyip Erdogan-ia asü khu lemsatep aser samar alirtem bushiba manener ta ashi.

"Lendong atalokli onoki Turkish Republic of Northern Cyprus den teka amteper search and rescue operations tenzü kogo," ta pai Deobarnü mitkar sentong ka nung ashi.

Iba rong tasazük metong metre 40 aser lenden metre 10 talang kanga kera senzüba Filo Jet rong ka lira ser Turkey nisan songer senzüa liasü, ta Marine Traffic ajanga ashi.

Iba rong ya Filo Denizcilik company meyong liasü.

TRNC ya Turkey kisü ngi agizüker aser Cyprus asetkong shilem asem kuma sadanger north tsütsü yimsü asür, koba 1974 nungi sadanger lir.

Iran-i Jordan aser UAE nung US indang base tem amak

Tehran, Luroi/August 31 (Agencies): US-i Larak asetkong amakba sülen iba atema telangzüba agüja Iran-i Jordan nung US indang base tem aser United Arab Emirates nung US military indang asset tem makogo. July ita sülen tang mezü ng huba linük ana yagi kati ka maktepogo.

United States-i sangdong ka ajanga parnoki Strait of Hormuz kübok Larak asetkong nung Iran nunger indang rocket launcher ana makogo, ta ashiba sülen Iran-i iba telangzüba agüja liasü. US nunger ketdangsür kati Al Jazeera Arabic dang ashiba agi, item launcher tem ya tzü yim nung toktsüba mine bena aliba missile tem khaloktsütsü atema renema liasü.

Iba asetkong amakba sülen Iran tir Masoud Pezeshkian-i ashiba agi, Iran-i rara memenaner, saka parnok makra odangbo mena matatsü.

"Iran-i onok amakertem nem telangzüba tesashi agütsütsü," ta Pezeshkian-i ashiba Iran indang news agency Fars-i metetdakttsü.

Islamic Revolutionary Guard Corps (IRGC)-i ashiba agi, US-i Deobar aonung iba asetkong amakba sülen Iran nunger sepai aser civilian tem tepsetba den aika yirutsüogo.

IRGC otongdar Sardar Mohebi-i, iba tesem amakba atema US aitsüogo aser rongsenketzü ng aser military dak sendakba nung lenla balala nung telangzüba agütsütsü ta shiogo.

Ajisüaka Hombar anepdang US Central Command (CENTCOM)-i X nung post ka ajanga, parnoki Larak asetkong amakba ya IRGC-i "act of aggression" ka ta shiogo, koba tai lir ta ashi. CENTCOM-isa, parnoki IRGC indang mine toktsüba force tem amak, koba Strait of Hormuz atema amokmeren ka liasü, ta ashi.

"Shitakbabo Iran-iang lendong atalokdakttsütsü atema jenjang agi, saka US military-i tzü yim nung senzüba civilian tem, shishilemba dang amshiba rongtem kü mzüka toktsütsü aser alima rongsenketzü ng nung kecha tetsükdakttsü

madokdakttsütsü atema amokmerentem agintsüogo," ta CENTCOM-i ashi.

US tir Donald Trump-i Hombarnü pa indang Truth Social platform ajanga, Kharg asetkong ajasatsüogo, ta ashi. Trump-i iba olen lemsatepba dak sendakba nung Iran-i kecha telangzüba agüja mali.

Taoba hopta US tir-i, tzü yim nung tokja aliba mine ajak detonate sütsüogo mesüra agintsüogo aser Iran dang mine tasen toktsüba rong ajak raksatsütsü ta shiogo.

Iran indang Ministry of Foreign Affairs-i, Larak asetkong amakba atema US aitsüogo aser ashiba agi, iba ya linük sovereignty aser territorial integrity anema lir.

Iba tesem amakba sülen civilian aser sepaitem ishika taküm samaogo, ta shisem.

US-i iba tesem amakba sülen mapang tatsüka lir IRGC-i, Jordan nung King Hussein aser Al Azraq US military base tem drone aser missile amshia maka liasü, ta Iran media sangdong balala ajanga metetdakttsü.

Iba tesem amakba mapang technical aser repair infrastructure raksatsüogo aser iba den tsükchir sepaitem deployment tesem dena raksatsüogo, ta IRGC-isa metetdakttsü.

Tehran-i, Jordan nung item tesemtem amakba ya self-defence atema UN Charter kübok parnok nem temeden agüja aliba amshiba lir ta ashi.

"Iran indang armed force temi Deobar aonung Jordan kübok Larak amaktsü atema amshiba US military indang base makogo," ta kasa sangdong ajanga metetdakttsü.

Kasa mapang nung US nunger ketdangsür kati Al Jazeera Arabic dang ashiba agi, parnoki Jordan amaktsü atema Iran-i yokba missile aser drone tem nokdangtetogo. Jordan nung US sepaitem missile amshia amakba ajanga Iran tashi meiti akümba sayur, ta ketdangsür yagisa shisem.

US-i ashiba agi, Tehran-i Jordan amaktsü atema medium-range ballistic missile tem amshia liasü.

Maneni Hombarnü Jordan army-i ashiba agi, parnoki Iran-i khaloktsüba missile ti khadangogo. "Tanep zü ngia lia linük dak khaloktsüba missile ti Air defence system temi khadangogo," ta army otongdar kati ashi.

Hombar anepdangsa IRGC-i sangdong ka ajanga, parnok indang air defence-i long-range American MQ9 drone ka khazüka yokogo, ta ashi.

Iran army-isa, parnoki UAE kübok Al Menhad airbase nung US military asset tem drone yoka makogo, ta ashi.

Kasa sangdong ajangasa, parnoki base nung US nunger sepaitem aser helicopter tem amendaka aliba tesem makogo, koba Larak asetkong amakba mapang IRGC zü ngsemtem aser civilian tem tepsetba mang ayangba liasü, ta ashi.

Hombar anepdang UAE indang Ministry of Defence-i ashiba agi, parnoki Iran-i yokba drone tem nokdangogo. Ajisüaka Iran-i parnok indang airbase amak ta ashiba osang ya shitak masü ta shiogo.

10buba Capt N Kenguruse Memorial Football Tournament Nov 2 nü tenzüksü



Kohima, Luroi/August 31 (TYO): 10buba Capt (Late) N Kenguruse, Mahavir Chakra Memorial Football Tournament November 2 nungi 10 tashi Kohima aser Chümoukedima nung asayatsü. Taküm iba asayamung nung team 20-i shilem agitsü imlar.

Iba asayamung ya Capt (Late) N Kenguruse, Mahavir Chakra tenüng nung ayongzükba lir, aser iba ya Nagaland nung tongtibang football asayamung ka kümogo.

Asayamung ya Spear Corps (Indian Army) aser Headquarters IGAR (North) tawabangba kübok Nagaland Football Association (NFA), Kohima District Football Association (KDFA) aser Chümoukedima District Football Association (CDFA) nung longjemer ayongzuka asayatsü.

IGAR (North), Kohima tenüng nung iba asayamung indang osang agütsüba mapang Commandant, 17 Assam Rifles, Col Tijo Joseph-i ashiba agi, asayamung ya knockout basis

nung asayatsü aser tesem ana nung asaya 20 tashi asayatsü renema lir.

Asayamung lapokba sentong, pool asaya 12 aser quarterfinals asaya pezü Indira Gandhi Stadium, Kohima nung November 2 nungi 6 tashi asayatsü aser iba sülen semifinal, tasembuba jenjang atema asaya aser final Chümoukedima Football Stadium nung November 7 nungi 10 tashi nung asayatsü. Asayamung shibangba sentonga Chümoukedima Football Stadium nung dang agitsü, ta paisa shisem.

Kasa mapang nung NF treasurer aser Youth Resources & Sports, Nagaland OSD, Roko Angmi-i ashiba agi, Indira Gandhi Stadium yanglushitsü ali nung taküm iba asayamung ya tesem ana nung asayatsüa kümogo.

Maneni Col Joseph-i, team 20 rongnung state kübok district football associations 17 nungi team kaka, 164 TA Battalion nungi team ka, Nagaland Police team ka aser Dibrugarh (Assam) nungi team

ka densema lir, aser team tem ya pool pezü (team pongungu) kuma lemsar asayatsü, ta ashi.

Asayamung atema züngoksemtüsü asoshi September 1 nü 6 ako nungi mapang lapoktsütsü aser Septemeber 30 nü aonung 8 ako nung shibangtsü. Fixture ya October 7 nü sangdongtsü, ta paisa metetdaksü.

Colonel Joseph-i ashiba agi, taküm ajak senteper senpet sen lakh 8.69 agütsütsü, koba taoba küm dang nungi lakh 2.22 agi timba lir.

Asayamung akoker nem senpet sen lakh 4 aser runner-up nem senpet sen lakh 2 agütsütsü. Tasembuba aser pezübuba nem senpet sen lakh 1 aser 75,000 agütsütsü.

Kija aser team award tem rongnung Golden Boot (Rs 20,000), Best Goalkeeper (Rs 10,000), Best Midfielder (Rs 10,000) aser Player of the Tournament (Rs 15,000) densema lir. Asayamung akokba team nungi Manager, coach aser physio nem senpet sen 8000 aser runner-up team nem 5000 agütsütsü.

Sen-i anir India nunger asayatem China Masters asayatsü



Luroi/August 31, 2026 (Agencies): BWF World Championships nung kanga kara tsukatokba tezudang tesülen toktsür USD 1.25 million China Masters Super 750 nungbo junga asayatsü atema Lakshya Sen renemdar. Iba asayamung ya Shenzhen nung Mongolbarnü tenzüksü.

Ajisüaka Sen asoshi mezüngbuba round asaya kanga melarabo masütsü, kechiyong pa France nunger world champion Alex Lanier den

asayatsü lir.

Tebur kija asaya nung taoba mapang World No. 1 Kidambi Srikanth-a mezüngbuba round nung Chinese Taipei nunger asayar Chi Yu-jen den asayatsü.

Srikanth-i taküm US Open Super 300 final tonga asayaogo, saka iba sülen junga masayateti arudar, aser Canada Open nungbo pa yiruba ajanga masayateti liasü.

Tebur tarep asaya nung fourth seeds Satwiksairaj Rankireddy aser Chirag Shetty na mezüngbuba asaya China nunger tarep Hu Ke Yuan aser Lin Xiang Yi na den asayatsü, shirnoki taküm Orleans Masters kokogo.

Kasa asayamung tetsür kija asaya nung lanur asayar Unnati Hooda, Tanvi Sharma aser Devika Sihag nunger asayatsü lir.

Rohtak nungi arishi küm 18

tain Unnati mezüngbuba round China tsür fifth seed Han Yue den asayatsü.

2022 küm arishi küm 14 asüba mapang Odisha Open Super 100 akokba sülen Unnati ya India tsürtem rongnungi BWF World Tour title ka abenba asayar tanutsütila aküm.

Iba sülen Unnati-i, Abu Dhabi Masters aser Odisha Masters na kokogo.

Maneni Tanvi-a Denmark tsür Amalie Schulz den asayatsü. Tanvi ya Taipei Open Super 300 akokba asayatem rongnung tanutsütila lir.

Tetsür kija asaya nungsa Devika mezüngbuba round Bulgaria tsür Kaloyana Nalbantova den asayatsü. Haryana nungi arishi küm 21 tain asayar ya rankings nung top 45 nung lir aser lai taküm Thailand Masters Super 300 kokogo.

Kagiso Rabada Australia den Test asayamung masayatetsü

Luroi/August 31, 2026 (Agencies): South Africa nunger fast bowler Kagiso Rabada hamstring tachichilen yiruba sülen pa Australia den test asaya asem asayatsü aliba nung shilem magitetsüsa kümogo, koba South Africa atema kanga takoksa tulu asütsü.



Rabada ya winter conditioning programme mapang yiru aser pa hopta 10 tashi masayatetsü imlar, anungji Test koba Durban nung October 9 nü nungi tenzüksü ali iba asayamung nung pa masayatetsüsa kümogo.

Taoba mapang South Africa nunger fast bowler aser tang Lions bowling coach Allan Donald-i, Rabada iba asayamung tepeyong masayatetsü ta shiogo. Pa domestic season nunga shilem agitsü timla mali kümogo.

"Pa Aussie Tests nunga shilem magitetsü," ta Donald-i ashiba South African media outlet News24-i Deobarnü metetdaksü.

South Africa aser Australia na Test asem asayatsü. Tanabuba Test ya Gqeberha nung October 18 nungi asayatsü

aser tatembangbuba test ya Cape Town nung October 27 nü nungi tenzüka asayatsü. Test asayamung masaya tsüngda September 24 nü nungi tenzüka ODI-a asem asayatsü.

Rabada maliba mapang South Africa team bowling attack nung tetsükdaktsü adokogo. Pa maliba mapang Gerald Coetzee, Corbin Bosch aser Kwena Maphaka nunger asayatsü imlar. Maneni Nandre Burger-a tang temang anepaluba mapang ka lir, saka pabo Test asayamung asayatetsü timla lir.

Rabada-i test 73 nung wicket 340 agir lir aser 2025 World Test Championship final nung Australia akokba mapang pai kanga tongtibang shilem agia run 110 agütsür wicket 9 agia liasü. Pai Australia den Test asaya 11 nung wicket 58 agir lir.

US Open: Djokovic mezüngbuba round nung tsükogo



Luroi/August 31, 2026 (Agencies): Deobarnü aonung US Open tebur kija asaya mezüngbuba round nung Novak Djokovic kanga timtema asayar mezüngbuba round nung tsükogo.

Arishi küm 39 tain asayar ya Mariano Navone den set pongu kanga meranga asayaba sülen 7-6 (5), 5-7, 4-6, 6-2, 6-1 agi tamakok nguogo. Tena tsüngda ghonda pezü ser minute 36 asaya liasü.

Iba asaya makokba ya Djokovic indang career nung 2006 Australian Open sülen Grand Slam ka nung mezüngbuba round nung tsükba mezüngbuba liasü. Iba asaya masaya tsüngda pa US Open nung mezüngbuba round nung khen danga tsüker maliasü.

"Ni jangradema masaya. Court telung nung nung timtemba nenokia ngur alitsü," ta Djokovic-i ashi.

Grand Slam 24 koker aliba asayar ya tasayadak nung khen saksü aser asaya tatemlen tetsüng tabelen nung timtem adokba nguogo. Asaya tom nung pa doctor-i mozü bener arua chidaktsü aser set pezübuba aser pongububa tsüngda medical timeout ka agiba mapang teberem nemshitsüsa akümba nguogo.

Iba asaya nung Djokovic-i unforced errors 70 tashi mena liasü.

Arishi küm 21 tain Navone shiba tang mezüngbuba US Open nung asayar, pa makokba sülen Djokovic atema iba ya US Open mesüra Grand Slam ka nung tatembanbuba asaya asü ta bilemer.

Asaya nung Djokovic temang nung timtem aliba repringtetogo aser pai taoba mapang ama masayatet, saka arishi küm 25 tain Navone, shibai taküm küm tetenzüklen pa indang career mung mezüngbuba ATP singles title benogo, pai kanga meranga asayar asaya kokogo.

"Kü atema asaya melarabo masü asü, kechiyong ni iba court nung 'GOAT' [greatest of all time] den asayar liasü," ta Navone-i ashi.

BILEMDANGANG

"Temeim agi nisung mulung sunepdaksür."